

**ХҮҮХЭД ХАМГААЛЛЫН ТУХАЙ ХУУЛИЙН ШИНЭЧИЛСЭН НАЙРУУЛГЫН
ТӨСӨЛ БОЛОН ХАМТ ӨРГӨН МЭДҮҮЛСЭН ХУУЛИЙН ТӨСЛҮҮДИЙН АНХНЫ
ХЭЛЭЛЦҮҮЛГИЙГ ЯВУУЛСАН ТАЛААРХ НИЙГМИЙН БОДЛОГЫН БАЙНГЫН
ХОРООНЫ САНАЛ, ДҮГНЭЛТ**

2023 оны 12 дугаар
сарын 18-ны өдөр

Улаанбаатар
хот

Илтгэгч нь: Улсын Их Хурлын гишүүн Ц.Идэрбат

Улсын Их Хурлын дарга, эрхэм гишүүд ээ,

Монгол Улсын Засгийн газраас 2023 оны 10 дугаар сарын 13-ны өдөр Улсын Их Хуралд өргөн мэдүүлсэн Хүүхэд хамгааллын тухай хуулийн шинэчилсэн найруулгын төсөл болон хамт өргөн мэдүүлсэн хуулийн төслүүдийн хэлэлцэх эсэх асуудлыг Улсын Их Хурлын 2023 оны 10 дугаар сарын 18-ны өдрийн хуралдаанаар хэлэлцэн шийдвэрлэж, анхны хэлэлцүүлэгт бэлтгүүлэхээр Байнгын хороонд шилжүүлсэн билээ.

Нийгмийн бодлогын байнгын хорооны 2023 оны 11 дүгээр сарын 07-ны өдрийн 14 дүгээр тогтоолоор хуулийн төслийг Байнгын хороо болон чуулганы нэгдсэн хуралдаанаар хэлэлцүүлэх бэлтгэл хангах, санал, дүгнэлтийн төсөл боловсруулах үүрэг бүхий ажлын хэсгийг Улсын Их Хурлын гишүүн Ц.Идэрбат ахалж, гишүүдээр Улсын Их Хурлын гишүүн П.Анужин, Б.Баярсайхан, Б.Бейсен, Б.Жаргалмаа нар ажилласан болно.

Нийгмийн бодлогын байнгын хороо 2023 оны 12 дугаар сарын 18-ны өдрийн хуралдаанаараа Хүүхэд хамгааллын тухай хуулийн шинэчилсэн найруулгын төсөл болон хамт өргөн мэдүүлсэн хуулийн төслүүдийн анхны хэлэлцүүлгийг Монгол Улсын Их Хурлын чуулганы хуралдааны дэгийн тухай хуулийн 39 дүгээр зүйлийн 39.10 дахь хэсэгт заасны дагуу зүйл бүрээр хэлэлцлээ.

Ажлын хэсгээс Засгийн газраас өргөн мэдүүлсэн хуулийн төслийн үзэл баримтлал, зарчмыг хөндөхгүйгээр салбарын мэргэжилтэн, судлаачдын зөвлөмжийг тусган боловсруулсан зарчмын зөрүүтэй 35 санал, найруулгын шинжтэй 1 багц санал болон хамт өргөн мэдүүлсэн хуулийн төслүүдтэй холбогдуулан зарчмын зөрүүтэй 19 санал гаргасныг хуралдаанд оролцсон гишүүдийн олонх дэмжсэн болно. Үүнд:

Нэг.Эцэг, эхийн үүрэг хариуцлагыг нэмэгдүүлж хүүхдийн дэргэд архи, согтууруулах ундаа хэрэглэх болон хэрэглэсэн үедээ хүүхэд байгаа орчинд нэвтэрснийг хүүхдийг эрсдэлт нөхцөлд оруулсан гэж үзэх, үе тэнгийн дээрэлхэлт үйлдсэн хүүхдийн хамтаар сэтгэл зүйн зөвлөгөө, үйлчилгээ, төлөвшилд нөлөөлөх сургалт, үйл ажиллагаанд хамруулах;

Хоёр.Боловсролын салбар дахь хүүхэд хамгааллын хүрээг өргөжүүлж багш, боловсролын сургалтын байгууллага нь хүүхэд хичээлдээ тодорхойгүй шалтгаанаар ирээгүй тохиолдолд нэн даруй эцэг эхэд мэдэгдэх, хүүхэд эрсдэлт нөхцөлд орсон тохиолдолд холбогдох ажилтанд мэдэгдэх, хүүхдийн эрх,

хамгааллын нөхцөл байдлын үнэлгээг хийх, эцэг, эхийн зөвлөл нь хүүхдийн эрх, хамгааллын бодлоготой байх;

Гурав.Цахим орчин дахь хүүхэд хамгааллын хүрээг өргөжүүлж хэвлэл мэдээлэл, өргөн нэвтрүүлэг, цахим орчинд хүүхдийг хортой, хориотой мэдээлэл, контентоос хамгаалах чиглэлээр холбогдох байгууллагуудын дотооддоо авч хэрэгжүүлэх арга хэмжээг зааж, цахим орчинд хүүхдийг урхидах, дээрэлхэх, дарамтлахыг хориглох;

Дөрөв.Соёл, спортын салбарт хүүхдийн оршин суугаа газраас өөр газарт 24 цагаас дээш хугацаагаар аливаа нэг арга хэмжээнд оролцуулсан тохиолдолд 15 хүүхэд тутамд заавал нэг хүн харгалзан явах, бүх төрлийн хурдан морины уралдааныг зохион байгуулагч харьяа орон нутгийн захиргаанд мэдэгдэх, уралдаанч хүүхдийн эрх, аюулгүй байдлыг хангах хүрээнд морио уралдуулж байгаа морины өмчлөгчид үүрэг, хариуцлага хүлээлгэх;

Тав.Гамшиг, онцгой байдлын нөхцөлд хүүхдийн амь нас, эрүүл мэндийг эрсдэлт нөхцөлд оруулан, байгаа газраас нь авч явах болон тээвэрлэхийг хориглох;

Зургаа.Хүүхэд хамгаалал, удирдлага, зохион байгуулалтын хүрээнд хүүхдийн эсрэг болон хүний бэлгийн эрх чөлөө, халдашгүй байдлын эсрэг гэмт хэрэг үйлдэж эрүүгийн хариуцлага хүлээсэн хүнийг хүүхдийн байгууллагад ажиллуулахыг хориглох, сум, хорооны 3000 хүртэлх хүн амд нэг хүүхэд, гэр бүлийн нийгмийн ажилтан байхаар тооцож ажиллуулах, хүүхдийн эрхийн хууль зүйн хорооны дарга нь Засаг дарга, түүний орлогч эсхүл хуулийн асуудал хариуцсан нэгжийн дарга байхаар, хүүхдийн эрхийн хууль зүйн хороо болон хамтарсан багийн санхүүжилт, үйл ажиллагааны зардлыг харьяа газар, орон нутаг нь төсвийн төсөлдөө заавал тусгаж эрх бүхий этгээдээр батлуулан, хэрэгжилтэд хяналт тавих;

Долоо.Хүүхэд хамгааллын хууль тогтоомжийн хэрэгжилтийг хангуулах, хяналтыг сайжруулах хүрээнд орон нутаг нь хэрэгжүүлсэн ажлынхаа тайланг жил бүрийн 2 дугаар сард хүүхэд, гэр бүл хөгжлийн асуудал эрхэлсэн төрийн захиргааны төв байгууллагад хүргүүлж, Хүүхдийн төлөө үндэсний зөвлөл нэгтгэсэн тайланг хэлэлцэн дүгнэж шаардлагатай тохиолдолд холбогдох этгээдэд чиглэл өгч ажиллах;

Найм.Тухайн шатны Засаг дарга хүүхдийн эрхийн олон нийтийн байцаагчийг баг, хороо бүрд ажиллуулж болохоор тус тус боловсрууллаа.

Байнгын хорооны хуралдаанаар хуулийн төслийг хэлэлцэх үед Улсын Их Хурлын гишүүн Б.Баярсайхан хүүхдийн асуудал хариуцсан агентлагийн даргыг хэзээ томилох талаар асуулт асууж, хариулт авлаа.

Улсын Их Хурлын гишүүн Ц.Мөнх-Оргил хуулийн төслийн 2.7 дугаар зүйлтэй холбогдуулан зарчмын зөрүүтэй санал гаргасан бөгөөд Байнгын хорооны хуралдаанд оролцсон гишүүдийн олонх дэмжээгүй тул Монгол Улсын Их Хурлын чуулганы хуралдааны дэгийн тухай хуулийн 39 дүгээр зүйлийн 39.19-д заасны дагуу цөөнх болж нэгдсэн хуралдаанд саналаа тайлбарлаж, үг хэлэхээ илэрхийлсэн болно.

39.19-д заасны дагуу цөөнх болж нэгдсэн хуралдаанд саналаа тайлбарлаж, үг хэлэхээ илэрхийлсэн болно.


Хүүхэд хамгааллын тухай хуулийн шинэчилсэн найруулгын төсөл болон хамт өргөн мэдүүлсэн хуулийн төслүүдийн анхны хэлэлцүүлгийг явуулсан талаарх Нийгмийн бодлогын байнгын хорооны санал, дүгнэлт, зарчмын зөрүүтэй саналыг Та бүхэнд хүргүүлсэн болно.

Улсын Их Хурлын эрхэм гишүүд ээ,

Хүүхэд хамгааллын тухай хуулийн шинэчилсэн найруулгын төсөл болон хамт өргөн мэдүүлсэн Хууль хүчингүй болсонд тооцох тухай, Хүүхдийн эрхийн тухай хуульд нэмэлт, өөрчлөлт оруулах тухай, Гэр бүлийн хүчирхийлэлтэй тэмцэх тухай хуульд нэмэлт, өөрчлөлт оруулах тухай, Хүн худалдаалахтай тэмцэх тухай хуульд нэмэлт, өөрчлөлт оруулах тухай, Нийгмийн халамжийн тухай хуульд нэмэлт, өөрчлөлт оруулах тухай, Гэр бүлийн тухай хуульд нэмэлт, өөрчлөлт оруулах тухай, Зөрчил шалган шийдвэрлэх тухай хуульд нэмэлт, өөрчлөлт оруулах тухай, Эрүүл мэндийн тухай хуульд өөрчлөлт оруулах тухай, Хууль зүйн туслалцааны тухай хуульд өөрчлөлт оруулах тухай, Гамшгаас хамгаалах тухай хуульд нэмэлт оруулах тухай, Онц байдлын тухай хуульд нэмэлт оруулах тухай, Төрийн хэмнэлтийн тухай хуульд нэмэлт, өөрчлөлт оруулах тухай, Иргэний улсын бүртгэлийн тухай хуульд өөрчлөлт оруулах тухай, Төрийн болон орон нутгийн өмчийн хөрөнгөөр бараа, ажил, үйлчилгээ худалдан авах тухай хуульд нэмэлт оруулах тухай хуулийн төслүүдийн анхны хэлэлцүүлгийг явуулсан талаарх Нийгмийн бодлогын байнгын хорооны санал, дүгнэлт, зарчмын зөрүүтэй саналын томъёоллыг хэлэлцэн шийдвэрлэж өгөхийг Та бүхнээс хүсье.

Анхаарал хандуулсанд баярлалаа.

**ХУРАЛДААН ДАРГАЛАГЧ,
УЛСЫН ИХ ХУРЛЫН ГИШҮҮН**



Ж.ЧИНБҮРЭН